

MF 40704

Yc

103



Biblioteka Uniwersytecka  
we Wrocławiu

Wratislaviana

Yc 103 80513

MF 40704

yc 103  
m 40704

80513 GSt

Eduard Gebauer  
Buchbinderei  
BRELAU  
Königsplatz 10.

Einfeltige erklerung

Des Gebets / des Va-

ter vnser / welches vnser lieber Herr  
 Christus seine Jünger gelernet / von wort zu wort /  
 vff jed:n Buchstaben ein Vers gemacht / darinnen begrif-  
 fen wird / wie Gott den Menschen geschaffen / Item / wie er auff  
 anregen des Teuffels wider Gottes Gebot gehandelt vnd gefal-  
 len / vnd wie er widerumb zu recht vnd gnaden bracht worden /  
 Nemlich durch Christum / wie er selbst im Rahtschlag der Heiligen  
 Dreyfaltigkeit gewilliget vor den Menschen zu sterben. Vnd wie  
 er / als die zeit erfüllet worden / Geboren / Geraufft / am achten  
 Tage beschnitten / Item / wie die weisen aus Morgenlandt ges-  
 chent bringen. Darnach was er in seiner Menschheit gelernt / vnd  
 wie er auff seiner Jünger bitte sie das Vater vnser lernet / wie er  
 sie aussendet zu Predigen / die Krancken gesund machet / die Tod-  
 ten Auffwecket. Vnd lezlich / wie er Gestorben / Begraben / am  
 dritten Tage Auffstehet / gen Himmel feret / den heiligen Geist  
 ernder sendet / vnd wie er wird wider komme / zu richten  
 die Lebendigen vnd die Todten. Vnd ist also  
 in diesem Vater vnser das ganze  
 werck vnserer Erlösung notz  
 kürfftig begriffen.




Gestellet durch Mattheum Junckern  
 zu Dresden / Anno 1585.

Mit angehengtem Ehren Tittel / der  
 Käyserlichen vnd weitberühmbten  
 Stadt Drislaw.



Gedruckt zu Dresden / durch An-  
 dream Morgenrodt / 1585.



80513 G. St



**Zu Ehren/ vnd Glück-**  
seligem Newen Jare/ den Gestrengen/  
Edlen/ Ehrnuesten/ Achbarn/ Hochweisen vnd  
wolbenambten Herren/ Hauptman Bürgermeistern vnd  
Rathmannen / der Käyserlichen vnd weiterumben  
Stadt Breslaw / Meinen großgünstigen  
Herren vnd mechtigen För-  
derern.

Gottes Gnade vnd Segen/ durch  
Christum vnsern Heylandt/ Amen.

**E** hat großgünstige vnd  
wolbenambte Herren/ vnser lie-  
ber Herr vnd Heylandt Ihesus  
Christus / warer Gott vnd  
Mensch/ der mit seinem Himli-  
schen Vater Allmechtig vnd Allwissend/ wol ge-  
wust/ das des Menschen sinn vnd gedanken/ nach  
dem fall also zerritet vnd geschmälert / das wir  
nun was hoch/ wichtig vnd Götlich ist/ nicht lan-  
ge ohne andere zufelle vnd frembde gedanken/ (die  
bisweilen der Teuffel vnser abgesagter Feind dem  
Menschen ein giebet) im sinn haben oder mit ernst  
vnd andacht dauon reden können / derhalben hat  
er ( als ihn seine Jünger baten / Er wolt sie auch  
A ij Beten

Beten lernen/wie auch S. Johannes seine Jün-  
ger gelernet hette) Sie beantwortet vnd gesagt/  
Wann ihr Beten wollet/solt ihr nicht viel wort  
machen/wie die Heiden/ als wolt er sagen / was  
ihr bey Gott im Gebet zu erwer nottürfft suchet /  
braucht nur nicht viel wort/denn ewer Vater im  
Himmel/ weis vorhin was euch mangelt / vnd  
besser als ihr es im Gebet bey ihm suchen müget/  
denn ihr bleibet doch nicht mit den gedanken vnd  
langem Gebet/ohn andere zufell in der andacht.

Derhalben leret er sie das Vater vnser/ vnd  
spricht / Wann ihr zu Gott beten wollet/so spricht/  
vnser Vater in dem Himmel/dem Name werde ge-  
heiligt/etc. Vnd in diese kurtzen/aber sehr Geiſt-  
reichem Gebet/ist alles begriffen/was dem Men-  
schen zu diesem Leben/ von nöten sein mag.

Vnd also hab ich nun dis Gebet (nicht das  
ichs zureiſſen wolt/ sondern es stichet in seiner ord-  
nung) auch sein kurtz erkleret/vñ auff jeden Buch-  
stab einen Vers gemacht/ darin findet man / als  
in einer kleinen Bibel / das ganze Werck vnserer  
Erlösung nottürfftig begriffen/ vnd ist sonderlich  
dieses Tractätlein den Leyen / welche die Biblia  
nicht haben/oder aus weitleufftigkeit nicht alles  
fassen vnd begreifen mügen/ sehr nützlich/ Son-  
derlich aber der lieben Jugend/ das sie daraus  
verstehen

verstehen lernen/wie es von anfang der Welt zu-  
gangen/wie wir Menschen Geschaffen / durchs  
Teuffels anregen / von Gottes Gebot gefallen/  
vnd wie wir hetten ewig müssen verdampft vnd  
verloren sein vnd bleiben/Vnd wie wir auch durch  
kein ander mittel / weder im Himmel noch auff  
Erden/widerumb haben können zu gnaden bracht  
werden/den durch die heilige Geburt vñ Mensch-  
werdung/auch durch das vnſchuldige bitter Leid  
vnd sterben des Sons Gottes/welcher vom Him-  
mel ernider gemust/seiner Gottheit sich euffern/  
Menschliche natur an sich nemen / darin Leiden  
vnd sterben/Aufferstehen/gen Himmelfaren/vnd  
da den ewigen Gott mit vns Menschen widerüb  
versünen/Vnd wer nicht vnndötig / das Fromme  
Gottselige Eltern (von Gottlosen Eltern rede ich  
hie nicht) ihre Kinderlein/dieses Tractätlein täg-  
lich ein mal lesen/ Ja auch wol gar auswendig  
lernen lieſſen/damit sie also verstehen lerneten/ wie  
der Zorn Gottes ober die Sünde so hefftig gros  
gewesen/ (vnd noch) das sein lieber Son aus dem  
Himmel gemust/dieselbe mit seinem sterben zubü-  
ſſen/ So kündten sie als dann sein/ wann man sie  
fragte/antwortt geben/wie es eine gelegenheit mit  
dem Menschen gehabt / vnd wie sie sich forthin  
vor Sünden hüten solten.

Nichte aus einfalt/ es würde also dieses Ba-  
ter vnser bey den Leyen/ vnd der lieben Jugend  
grossen nutz schaffen. Der Allmechtige Gott  
helffe/das es ( wie es gemeinet ) gebraucht werde/  
so zweiffelt mir nicht/ es werden Fromme Eltern  
von ihren Kinderlein erfahren vnd hören/ das offe  
manch verlebter Man/ nicht verstanden hat.

Vnd hab also dieses Tractätlein zu Ehren/  
E. G. E. A. vnd H. W. Namen/ wegen der er-  
zeigten wolthaten/so mir in Breslaw widerfahren/  
zur danckbarkeit/ Dediciren vnd in Druck gehen  
lassen.

Der Allmechtige Gott wolle E. G. E. A.  
vnd H. W. Sampt allen den Ewrtigen/ein glück-  
seliges/fröliches/Friedsames vnd Freudenreiches  
Newes Jahr bescheren / Vber euch auch al-  
len sämptlich vnd sonderlich / sein Göttliche  
Allmechtige Hand vnd ausgerecktem Arm / wie  
bisherö geschehen / aller gnedigst halten/ vmb  
Christi Ihesu/ Des Newgeboren Kindlins vn-  
sers Erlösers vnd Seligmachers willen / Amen/  
Amen. Signat Dresden/ den 17. Decembris/  
Anno 1584.

E. G. E. A. vnd H. W.  
Dienstwilliger.

Matthes Juncker.  
Vom

V Om anfang als die Trinitet/  
A El Creaturn geschaffen hett/  
T rat sie zusammen hielt rathschlag/  
E y last vns heut vff diesen tag/  
R echt bereiten ein Menschenbild/  
V ff das er herrsch vber das Wild  
N ennen soll er auch alle Thier/  
S ie sind gleich fern oder allhier.  
E s thet der Mensch erkennen bald/  
R echt/ eines jeden Thieres gstate.  
D a fand der Mensch gar nirgend sehn/  
E in Thier/ das ihm hett gleich gesehn/  
R ahet zu/ sprach die Gottheit sein/  
D er Mensch mus nicht alleine sein/  
V nter den Thiern/ so jetzt bereit/  
B leibt gar keins auffs Menschen seite/  
I e wie ist ihm nun jetzt zu thun/  
S prach die Gottheit zu ihrem Sun/  
T rit alles von dem Menschen fern/  
I ch rath alsbald / sprach Gott der HERR/  
M it einem schlaff wil ich belegen/  
H eut den Menschen/ vnd rath pflegen/  
I ch wil ihn lassen schlaffen ein/  
M it meiner Hand/ nem ich ein Bein/  
E r fühle es nicht / aus seinem Leib/  
L ebend hat ich ihm draus ein Weib/  
G eschwind war wort vnd werck ein ding/  
E s bawt Gott da ein Weib galing/  
H ilff Gott sprach Adam / dieses Weib/  
E in Lieb ist sie aus meinem Leib/  
I n allen dingen sol sie mir/  
L eben gehorsam/sag ich ihr.

Gen. 1.

Gen. 2.

**I**ndem nam sie Gott bey der Hand/  
**G**ab sie Adam / hstet den Ehestand.  
**T**het sie beyd in das Paradis/  
**VV**eicht von dem Baum des erkentnis/  
**E**sse darvon nicht / es wird euch sunst/  
**R**ewen / vnd bringen in vngunst/  
**D**es tods müst ihr alsbald sterben/  
**D**arzu auch ewig verderben/  
**E**s marcke solches der Teuffel bald /  
**I**n die Schlang kroch er mit gewalt/  
**N**icht seumbe er sich vnd thet allda/  
**N**ahen zu Adam / vnd Eva/  
**A**n trieb er sie / das sie assen/  
**M**acht ihm die sach so süß der massn/  
**E**y Gott hats nicht so hart verboten/  
**Z**udem wird er euch nicht aufrottn/  
**V**on stund an werd ihr sein wie Gott/  
**K**önt alls verstehn / sag ich ohn spot.  
**O**weh / wie war das eine Lügen/  
**M**ie list thet er sie da betriegn/  
**D**amit aber der Baum des Leben/  
**E**rhalten würd / so mercke mich ebn/  
**I**cht kam ein Engel vnbeschwerd/  
**N**am in sein Hand ein hawent Schwerd/  
**R**echt trieb er Adam / wie Gott hies/  
**E**uam auch / aus dem Paradis/  
**I**ns elend musten sie nun ziehn/  
**C**unten Gottes zorn nicht entfliehn/  
**H**acken vnd rotten ist nun mehr/  
**D**arzu der Tod auch ewer ehr.  
**E**wig solt ihr geblieben sein/  
**I**ndem Geboten Gottes sein/

Gen. 3.

Gen. 3.

N icht

**N**icht gegleubet des Teuffels wort/  
**VV**elcher nichts guts stift / sondern mord/  
**I**st in der warheit nicht bestandn/  
**L**egt euch auch nun in seine Bandn/  
**L**auffe / rent vnd brauche all mäh vnd erbt/  
**G**reiffis an / das er euch gar verderbt.  
**E**s war der Mensch jetzt in der not/  
**S**tund da mit grossen hohn vor Gott/  
**C**unt ihm selbst thun kein hülff noch rath/  
**H**ats gar verderbt mit seiner that.  
**E**s sprach nu die Dreyfaltigkeit /  
**VV**ie / sol der Mensch in ewigkeit/  
**I**m elend bleiben also stehn/  
**E**s würde nicht lang mehr hingehn/  
**I**n zweiffel wird er fallen thon/  
**M**ich jammert dis / sprach Gottes Con/  
**H**elffen wil ich ihm aus der not/  
**I**ch büs für sie / mit meinem Tod/  
**M**ein Vater liebt so sehr die Welt/  
**E**r stelt mich für sie in das Feld/  
**L**est mich den Teuffel greiffen an/  
**A**n ihn wil ich gleich wie ein Man/  
**L**öfen mus ich die grosse schuld/  
**S**ol der Mensch kommn in Gottes huld.  
**O**wie ist Gottes lieb vnd gnad/  
**A**uff vns so gros / für die missthat/  
**V**om Himmel mus herab kommen/  
**C**h. istus, vns allen zu frommen/  
**H**elffen mus er vns zu genad/  
**A**uff sich nemen / auch vnsern schad.  
**V**nd da nu das beschloffen ward/  
**F**ürwar / dis vrtheil war sehr hart.

Esa. 14.  
 Joh. 8.  
 I. Pet. 5.  
 Gen. 3.

Joh. 3.  
 Matth. 4.

Psal. 69.

B E 6

E s stand aber lange zeit an/  
 R echt sehnlich hofften auff den Mann/  
 D auid / Abraham vnd Jacob/  
 Gen. 12. E y hierzu auch / Isaac vnd Job/  
 vnd 22. N eben dem auch / Propheten viel/  
 V ertiesen sich starck auff das ziel/  
 N icht liegen kan Gott in seim Wort/  
 Joh. 14. S ein Son mus aus dem Himmel fort/  
 E r mus annemmen Menschen gestalt/  
 R echt euffern sich der Gottheit bald/  
 T reten mus er in vnsern standt/  
 A ufflösen vnser last vnd bandt/  
 Phil. 2. G leich werden wie ein Menschen kindt/  
 L eben also/doch ohne sünd.  
 I est ist es nun geschehn also/  
 C hristus herab vom Himmel floh/  
 H at sich in vnser fleisch bekleide/  
 B ey des Keyfers Augusti zeit.  
 Luc. 1. 2. R echt grosse freud war da im Feld/  
 O all Engl aus des Himmels zelt/  
 T raten zum Hirten bey der Nacht/  
 G aben zeugnis/mit grosser macht/  
 I esund ist Christ der H E X X geborn/  
 B ey Gott ist nu gestile der zorn/  
 V ff Erdrich ist jetzt grosser friedt/  
 N iemand euch nunmehr schaden wirdt/  
 S ingt/lobt vnd preist Gott vberall/  
 Gen. 17. H alleluia / mit grossen schall.  
 Leuit. 12. E s wurd diß Kindlein auch beschnitten/  
 Luc. 2. V ber acht tag / nach Abrams sutt /  
 T rat doch auch in Tempel Simon/  
 E r nam vff sein arm Gottes Son/  
 V nd

V nd sprach / Im fried fehr dein Diener/  
 N eben dem kamen auch daher /  
 D ie weisen Leut / aus Morgenland /  
 V nd brachten gros geschenck zu hand /  
 E rfflich / schanckten sie ihm gut Gold /  
 R echt wie man ein König thun solt /  
 G aben darnach / Myrr vnd Weyrauch /  
 I n derselben zeit / war solch brauch /  
 B ey dem man zuersehen hab /  
 V or vns solt Christus / in das Grab.  
 N un als er jetzt alt war zwelff Jar /  
 S elt er sich in den Tempel dar /  
 V nter die Gerten vnd hörte /  
 N eben dem er sich befragte /  
 S ein verstand war so mechtig gros /  
 E s wundert sie / all vbr die maß /  
 R ichtig gab er von sich antwort /  
 E s hats kein Mensch vor nie gehört.  
 S eht an / als nu herkam die zeit /  
 C hristus solt für vns in den streit /  
 H at keinen Harnisch / schild noch Schwert /  
 V nd gieng barfus / allhie auff Erd /  
 L ies sich auch Tauffen im Jordans /  
 D urch Johannem / den wunderman.  
 E s thet sich auch der Himmel auff /  
 V V ie fleißig sah der Vater drauff /  
 I n gestalt einer Tauben weis /  
 E r schien auch der heilige Geist /  
 V V ie schrey der Vater da mit macht /  
 I e / das ist mein Son / gebt drauff acht /  
 R echt solt ihr ihm nun hören zu /  
 V nd ihm auch Göttlich ehr an thun /  
 W iß N icht

Mat. 60.  
 Matth. 2.

Act. 13.

Luc. 2.

Joh. 6.

Gal. 4.

Luc. 9.

Matth. 3.



N icht lang seumpfe sich an dieser stell/  
S athan/ vnd nam zu sich gesell/  
E r führt Christum zur Wüsten ein/  
R echt Brod solt er machen aus Stein/  
Luc. 4. N am ihn mit sich auff's Tempels zinn/  
S ih an/ dis alls ist dein gewin.  
C hristus solt ihn da beten an/  
H ör/ ist das nicht ein schelmisch Man/  
Psal. 91. V nd nimpt ihn mit sich vff den Berg/  
L est ihn an sehn all wunderwerck/  
D is alls spricht er/ ist dein eigen/  
I st das auch leichtlich zuerschweigen.  
G ar bald gab ihm Christus antwort/  
E y/ hastu Gottes Wort gehört/  
R echt/ so sag ich/ weich jekt von hier/  
N ichts hastu zu befehlen mir.  
V nd also welch der grobe bengl/  
E s traten zu Christo/ die Engl/  
R ühmten ihn/ dienten ihm fort/  
G aben auch achtung vff sein wort.  
E s sieng nun Christus sein Ampt an/  
Luc. 4. 10. B rediget sein Wort jederman/  
Matth. 3. E rwehlet etlich jünger ihm/  
10. N am die in seine Disciplin/  
V nterricht sie in seiner Lehr/  
N eben ihm/ zohen sie daher/  
D ie bathen ihn/ das er doch thet/  
F ürs erst/ sie leret ein Gebet.  
V on stund an sprach Christus ihr solt/  
R echt beten zu Gott/ wann ihr wolt/  
E rhöret werden all zu gleich/  
V nser Vater im Himmelreich.

N ichts

N ichtes anders denn dein Göttlich Nam/  
S ey gehiligt vnd lobesam.  
N icht des Türcken/ sondern dein Reich/  
I n vns kom/ vnd gschch dein Wil gleich.  
C Heut gib vns vnser täglich Brodt/  
T reib von vns ab/ all Krieg vnd Mord.  
I n vnser schuld gedulde dich/  
N iemand beleidigt wir mehr nicht.  
V nd in versuchung vns nicht führ/  
E rlös vns/ wir hoffens zu dir.  
R echt von dem vbel vber all/  
S eh vns in dein Himlischen Saal.  
V nd dein ist's Reich vnd herrlichkeit/  
C raffte/ vnd die macht in ewigkeit.  
H ierzu war Christus im Geist fro/  
V nd dancket sein Vater also/  
N icht den Klugen vnd Weltweisen/  
G abstu dein Wort/ die Seeln zu Speisn/  
S ondern/ den Fischern die da warn/  
O hn grossen verstand/ in ihrn Jahrn.  
N ach dem schickt er sie in die Welt/  
D en gab er weder schuh noch gelt/  
E r selber zoch auch immer fort/  
R ümbt sein Vater/ predigt sein Wort.  
N am alle arme Sünder an/  
E r wolt sie nimmer von sich lan.  
R echt tröst er die blöden Gewissn/  
L egt ihr Joch ab/ maches ihn gar süß.  
O ch mache er die Kranken gesund/  
S ie kamen gleich/ zu welcher stund.  
E r hat die Lamen gesund gemacht/  
V nd

Luc. 11.  
Matth. 6.

Luc. 10.

1. Cor. 1.

Luce. 10.  
Matth. 10.

Mat. 11.  
Esa. 35.

W iij

V nd

**V**nd die bfeffen zu recht gebracht.  
**N**icht hüfflos lies er auch die Tabern  
**S**tarblinde/ mustn ihr gsicht haben/  
**Luc. 11.** **V**nd hat die todten aufferweckt/  
**O**bsie drey tag im Grab gesteckt.  
**Matt. 9.** **N**ach dem nun alles war verricht/  
**Luc. 7.** **D**as er auch solt/ wie die Schrifte spricht/  
**Joh. 11.** **E**instellen sich / wie ein schlacht Lamb/  
**Luc. 9.** **M**it seim zarten Leib lobesam /  
**Zach. 9.** **V**nd da bezalen vnser schuld/  
**Matt. 21.** **B**eim Vater vns erlangen huld/  
**E**rgab er sich willig darein/  
**L**egt zu Jerusalem ehr ein/  
**D**enn da er auff ein Esel kam/  
**E**in jederman ihn da annam/  
**N**amen die Kleider jung vnd alt/  
**Luc. 19** **N**eben dem auch / zweig aus dem Wald/  
**D**ie strewten sie ihm auff dem Weg/  
**E**s wurden auch geziert die Stieg/  
**Enc. 21.** **I**ederman schry Hosianna /  
**Matt. 21.** **N**un lobet den der kompt allda.  
**Mar. 11.** **I**n den Tempel gieng er herum/  
**Esa. 56.** **S**ties den Wächslern die Tische vmb/  
**T**rieb sie mit Peitschen da hinaus/  
**D**er Tempel/sagt er/ists Bethaus.  
**A**ls die im Consistorium,  
**S**ahen dis geschrey vnd gros gebrum/  
**Matt. 26.** **R**ieffen sie an die Obrigkeit/  
**E**rgu sprachen sie/ es ist zeit/  
**I**cht kompt einer thut sich nennens/  
**C**hristum/ ihr werd ihn all kennen/  
**H**at das gemeine Volck versürt/

Vns

**V**ns zu leiden/ das nicht gebürt.  
**N**empt diese sach in gute acht/  
**D**as wir bestellen eine Wacht/  
**D**ie ihn greiffen / vnd vns bringen/  
**I**n wollen wir gar bald bzingen/  
**E**r soll mit seinem leben nicht/  
**K**ommen daruon/ der erböswicht.  
**R**echt nach dem abendestn schon/  
**A**ls ihn Judas verrith mit hohn/  
**F**ingen sie ihn / peitschten ihn sehr/  
**T**raten für ihn/ schmechten sein ehr/  
**V**nd speiten ihm ins Angesicht/  
**N**iemand erbarmt sich da sein nicht/  
**D**ie Krieges knecht/ schlugen ihn dar/  
**D**ruckten ihm auff ein Kron ist war/  
**I**ns Heupt / die war von Dorn gemacht/  
**E**s entgieng ihm all seine macht/  
**H**infürten ihn die Jüden da/  
**E**r must auff den Berg Moria /  
**R**echt sein Creuz tragen/ wie ich sag/  
**R**ichteten ihn auff/ nach mittag/  
**L**ebt alda am Creuz etlich stund /  
**I**hm ward vor durst gar dürr sein Mund/  
**G**aben ihm essig / vnd auch Gall/  
**K**leglich schry er mit grossen schall/  
**E**li/ mein Gott/nim jetzt zu dir/  
**I**n deine HEND/ mein Geist von mir/  
**T**rieb dis geschrey/ bis er verschied/  
**I**m sein Leib Nicodemus bit.  
**N**am ihn vom Creuz / legt ihn ins Grab/  
**N**eben dem Gott viel zeichen gab.  
**E**r stund auch bald am dritten tag /

VVider

Cap. 1.

Joh. 19.  
Esa. 50.  
vnd 63.

Mar. 15.  
Joh. 19.  
Psal. 22.  
Gen. 22.

Psal. 69.  
Psal. 22.  
vnd 31.

Matt. 27.

Act. 13.  
2. Thi. 2.  
Luc. 24.

VVider vom Tode/ohn alle klag.  
Act. 1. I n Himmel/ist Christus der H E R R  
Matt 25. G efahren auff / sandt sein Geist her/  
K ompt zum Gerichte/ernieder bald/  
E r wird erwecken jung vnd alt/  
I ederman wird ergeben lohn /  
T rewlich / wie sie verdienet hon.

Act. 20. A lso hat nu Christus der Held/  
M ie seinem Blut/erlöst die Welt.  
E wig / sagen wir lob vnd ehr/  
N iemand/denn Gott/vnd Christ dem H E R R n.



Ehren

## Ehrentittel: Der Keyserlichen vnd weitberümbten Stadt Breslaw.

**I**n Breslaw der löblichen Stadt/  
Iustitia ihr wohnung hat/  
Denn wie ich selber hab gesehen/  
Lest man niemand vnrecht geschicht.  
Erstlich werden da die Frommen/  
In ihrer Herrn schutz genommen/  
Die Verbrecher/vnd bösen leut/  
Bekommen ihre straff zur Deut.  
Es wird auch in der Kirchen fordt/  
Gelert / das reine Gottes Wort/  
Mit grossen ernst / vnd mit andacht/  
Laufft das Volck zu/heuffig mit macht/  
Alle Morgen wennes sieben schlegt/  
Leuet man da auch zum Gebet/  
Da list man ordentlich die Bibel/  
Dis gfiel mir wol / steht auch nicht vbel/  
Wenniglich höre Gottes Wort gern /  
Lernen sich draus / von Sünden fern.  
Es ist auch noch eins hart hierbey/  
Nemlich/ein schöne Liberey/  
Die wird in grosser ehr gehalten/  
Man lest dri n lesen/jung vnd alten.  
In den Schuln wird die jugend schlecht/  
Vnterrichte im Wort Gottes recht/  
Man helt sie in der Disciplin/  
Das briengt ihn lob / ehr vnd gewin.

E Auch

Auch habe ich gehört allda/  
Das man all tag singt Musica,  
In der Kirchen nach Zehen Uhr/  
Dis treiben sie / so für vnd für.  
Damit die Jugend wird geübt/  
Von menniglich auch drumb geliebt.  
Noch eins ich bald vergessen heit/  
All Freytag wenn es Zehen schlegt/  
Vor Mittag / so leutet man da/  
Die grösten Glocken offenbar/  
Das ich jeder erinnern mag /  
Wie Christus ebn am Karfreytag/  
Umb die zeit ausgeführet ward/  
Ans Creuz geschlagen da gar hart/  
Daran er auch gestorben ist/  
Mit sein Tod vnser Sünd gebüß.  
Vnd vns wider zu gnaden bracht/  
Das dancken wir ihm tag vnd nacht.  
Zu dem helt auch in dieser Stadt/  
Schr schön ordnung ein weiser Rath.  
Inde / das sie mit grossen fleis/  
Zusammen gehn / drumb ich sie preis.  
Die ganze Wochen alle tag /  
Hören an da eins jeden klag/  
Sielassen auch auff dem Rathhaus/  
Jeden sein nothdurfft reden aus/  
Diese tugent Gott wolgefelt/  
Drumb ehr ihr Regiment fest helt/  
Vnd nach befindung thun sie eben/  
Jeder part richtig bescheid geben/  
Es ist auch ihre Cantzley /  
Echr wol bestellet / hart darbey.

Vnd

Vnd wer dahin gewiesen wird/  
Er hat bescheid / was ihm gebürt.  
Sie halten auch offi Cammerrath/  
Wer dann daruor zuschaffen hat/  
Der hat antwort auff sein beger/  
Er sey von nahen/oder ferr.  
Der Schöpffenstuel / wird auch gehalten/  
Da mögen kommen/jung vnd alten/  
Ihr sachen ordentlicher weis/  
Vorbringen / die Herren sind weis/  
Nemen die sach fleißig in acht/  
Vnd wann sie es habn recht betracht/  
Vorabschiedet / werden sie sein/  
Das beide Part zu frieden sein.  
In summa/es ist wie es sol/  
Vff dem Rathhaus bestellet wol/  
Das die Bürgerschafft ihre Herrn/  
Drumb fürchten vnd halten in ehrn.  
Es ist auch da die Bürgerschafft/  
Gegen den frembden sehr ehrhafft/  
Thun denselben viel guts erzeign/  
Druin lä ichs hier auch nicht verschweign.  
Ich mus auch sezt zu dieser fart/  
Melden / das gar wenig hoffart/  
Zu finden ist / in dieser Stad/  
Die Demut da ihr Wohnung hat/  
Bey allen Stendten/ arm vnd Reich/  
Das ich kaum find dieser Stad gleich.  
Die Springer vnd die grossen Kraussn/  
Sind man durchaus in keinem Hause.  
Dis hat mir so sehr wolgefallen/  
Das ichs mus rühmen vberall.

E ij

Noch

Noch eins meld ich jetzt offenbar/  
Habs nicht gesehn / doch ist es war.  
Das der Rath/in Breslaw der Stadt/  
Ein grossen Vorrath an Korn hat /  
Damit sie denn in Hungers noth/  
Armen Leuten helfen zum Brod.  
Sie haben auch ein festen Baw/  
An die Oder gesetzt ohn schaw/  
Die Keyserliche Maiestad/  
Ihnen solches vergünnet hat.  
Wiewols etlich nicht gerne sehn/  
Doch müssen sis lassen gesehn.  
Welch Baw die Stadt gar herrlich ziert/  
Der Feind auch mit erschreckt wird,  
Ihre Zeugheuser sind geziert/  
Das man darin kein mangel spürt/  
Damit sie denn versorget seind/  
Das ihn nicht leichtlich schad ein Feind.  
Der Baw vnd ihr Artelarey/  
Macht dieser Stad ein gros geschrey/  
Das mancher Fürst vnd grosser Herr/  
Sich hierüber verwundert sehr.  
Es wird auch alle tage fort/  
Marek gehalten/an manchem ort/  
Da kan menniglich vmb sein Gelt/  
Bekommen / was ihm wolgefelt/  
Es sey Fleisch/Fisch/Wiltpret vnd Brod/  
Auch was ihm am Gemüs thut not.  
Diß alles ist die menge feil/  
Kans bekommen / mit grossen eil.  
Summa in dieser Stad Breslaw/  
Ist alles zubekommen da/

Das

Das man nicht viel Stede find dergleichen/  
In dem gansen Römischen Reich.  
Es stehe auch an der Oder stolz/  
Ein grosser vorrath Feuerholz/  
Als ichs zu sehen thet begern/  
Muß ich wider daruon umbkern/  
Denn die zeit war so kurz bestellt/  
Das ich wider muß in das Feld.  
Es lieget auch vor dieser Stadt/  
Ein vnzehlich grosser vorrath/  
An Bawholz / etlich tausent Stemm/  
Das manchen auch gros wunder nem.  
Wann ich es nicht künnt beweisen/  
Dürfft man mich wol liegen heissen.  
Es hat auch ein hochweiser Rath/  
Vor Breslaw/der löblichen Stadt.  
Viel Ziegelscheinen / wol bestellt/  
Das jeder Bürger vmb sein geld/  
Bekommen kan / da Mauerstein/  
Damit er bawet/ bessere das sein/  
An der Oder liegen ohn schew/  
Herrlich vnd schön Mühlgebew/  
Die all mit Hengwerck wol bestellt/  
Das ihn durchs Jar kein Wasser fehle/  
Vnd wann auch kompt gros Wasserauff/  
Kan man die Gäng all ziehen auff/  
Damit also durchs ganze Jar/  
Die Mühlen gehn ohn einig gfahr.  
Ober der Oder ist ein Auen/  
Darauff ist auch nach lust erbawen/  
Den Büchschützen ein schön Haus/  
Das sie im Sommer ziehen naus/


Schib


Schiffen mit freuden nach der Scheibn/  
Thun auch sonst ander kurzweil treibn/  
Manchen Bürger mit Weib vnd Kind/  
Am Sontag man auff dem Blas find.  
Die Schützen schencken nach dem besten/  
Schöps/darzu haben sie viel Gest  
Die im Keller / vmb kurzweil willn/  
Mit einander in dem Bredspicln.  
Noch eins haben sie wol bedacht/  
Wann da ein Schütz sein Essen macht/  
So geschicht es vff dem Schiffhaus/  
Als bald man hat geschossen aus.  
Gibe man ein jeden sein verdienst/  
Wann er getroffen/ mit gewinst.  
Deßgleichen auch die Armbrust Schützen/  
Machen ihn ihre kunst auch nütze/  
Fast alle Sontag sind sie auch/  
Beysammen/ nach den alten brauch/  
Ecken ein Vogel auff die E tangen/  
Schützen darzu mit gros verlangen/  
Ein jeder hett ihn gerne runder/  
Vnd wann er feilt/ nimpt es ihn wunder.  
Echeust einer dann den Vogel ab/  
Ist er lustig/wil sein gewin habn/  
Vnd wenn ich alls beschreiben wolt/  
Nottürfftig/wie es wol sein solt/  
Müß ich hierzu haben viel zeit/  
Vnd wer auch nur weitleufftigkeit.  
Ich wils aber mit mein schreiben/  
Vff dißmal also lassn bleiben /  
Denn ich bin der Stadt wolgeneigt/  
Weil man mir driinn viel guts erzeiget/  
Vnd

Vnd wann man sich dann jeder zeit/  
Befleißten sol der Danckbarkeit/  
So wil mir auch gebühren nicht/  
Dieweil ich mich selbst hab verpflichet/  
Danckbar zu sein vor die wolthat/  
Die mir Breslaw erzeiget hat.  
Das ich solt nach der zusag mein/  
Darfür auch vndanckbar zu sein.  
Denn kein laster in dieser zeit /  
Ist vber die vndanckbarkeit.  
Derhalben hab ich mich bedacht/  
Diesen Lobspruch zu ehren gemacht.  
Ein erbarn vnd hochweisem Rath/  
In Breslaw/ der berümbten Stadt/  
So wol den Bürgern in gemein/  
Die alle wol verstendig sein/  
Halten die frembden Leut in ehren/  
Gott wol ihnen darfür beschern/  
Ein glücklich vnd frölich Jar/  
Das ihnen darinn widerfar/  
Was ihn ist gut an Leib vnd Seel/  
Es wolt ihn auch Emanuel,  
Tretten zur seit/vnd halten schutz/  
Das ihn nicht schad des Teuffels truck/  
Sondern was Christus / Mensch vnd Gott/  
Erworben hat mit seinem Tode/  
Geb ihn Gott im Himlischen wesen/  
Das wünscht ihn Matths Juncker von  
(Dresn.)

A M E N.












MF 40704  
Yc  
103



Biblioteka Uniwersytecka  
we Wrocławiu

Wrocławiana

Yc 103 80513  
MF 40704





Dionysius, 1502. Johannes